

12 November 2024

1700 Hrs

ایوٹننگ گو جری نیو ز بلیٹن مو رخہ 12 نومبر 2024

یوہ آکا شوانی جموں ہے محبوب سلطانی تے نصرت چودھری تیں خبر سُنو۔ پہلاں خاص خاص خبر۔

★1. فوج غی شمالی کمان غا کمانڈر لیفٹنٹ جنرل ایم وی سچندرا کمار نے دہشت گردی مخالف کا روائیاں، تمام اہلکاراں نانہہ پیشہ وارانہ مہارت تے چوکسی برقرار رکھن بارے کہیو ہے۔

★2. حفاظتی دستاں نے ریا سی ضلع مانہہ دُنیا غا سب تیں اُچا چناب ریلوے پُل ور ماک ڈرل منعقد کی۔

★3. جنگلات تے ماحولیات غا وزیر جا وید احمد رانا نے جنگلات غا تحفظ بارے کم کاج نانہہ روایتی طور ر جنگل مانہہ ربن آلا لوکاں سنگ رل غے کرن بارے زور پایو ہے۔

★4. تے وزیر تعلیم دھرمیندر پر دھان نے کہیو ہے جے 2047 تک ترقی یافتہ ملک بنن غو خواب تعلیم غے ذریعے ہی پورو کیو جا سکے۔

خبراں غی تفصیل نال پہلاں محبوب سلطانی۔

GOC Visit

فوج غی شمالی کمانڈ غا کمانڈر لیفٹنٹ جنرل ایم وی سچندرہ کمار نے اج کا روائی تیاریاں غو جائزو لین واسطے وائٹ ناٹ کو ر نگرہ جموں غو دورو کیو۔ اُدھم پو ر مانہہ واقع شمالی کمانڈ غا جی او سی غو 16 کو ر غا صدر مقام غو یوہ دورو ایسا وقت مانہہ ہے جد کشتواڑ غا دور دراز جنگلات مانہہ دہشت گردی مخالف کا روائی تیز کر دتی ہیں۔ واضع رہ جے حالیہ 5 تہاڑاں اندر اس علاقہ مانہہ فوج غا اک جے سی او تے دو گرائیں دفاعی گارڈز نانہہ دہشت گرداں نے شہید کر دتو تھو۔ شمالی کمانڈ نے اس سلسلہ مانہہ سماجی میڈیا غی سائٹ ایکس ور جانکاری دیتاں وائے۔

دسیو بے جے لیفٹنٹ جنرل کمار نے 16 کو ر گا صدر مقام غو دورو کر غے کا روائی تیاریاں غو جائزو لیو۔ اُنہاں نے تمام اہلکاراں نانہہ پیشہ وارانہ مہا رت تے چوکسی برقرار رکھن غی ہدایت وی دتیں۔ حفاظتی عہدیداراں نے دسیو بے جے کشتواڑ ضلع غا کُنتواڑہ تے کیشوان غا کول کال غا علاقاں مانہہ بڑا پیمانہ ور تلاشی کا روائی اج 6 ویں روز مانہہ داخل ہو گئی ہے۔ پچھلا اتاریں کیشوان مانہہ دہشت گرداں سنگ فائرنگ مانہہ فوج غی پرا 2 غا جے سی او نا ئب صوبیدار راکیش کمار شہید ہو گیا تھا۔ جد کہ 3 دوجا جوان زخمی ہو گیا تھا۔ اُنکاں ویروار آلے تہاڑے دہشت گرداں نے 2 وی ڈی جی ممبراں نانہہ اغواہ کر غے شہید کر دتو تھو جن غی پشان نذیر احمد تے کلدیپ کمار غا طور ور کی گئی تھی۔ بڑا پیمانہ ور تلاشی کا روائی غے دوران دہشت گرداں سنگ کو ئی تازو رابطو نہیں ہوؤ ہے۔

Mock Drill

ریا سی غی ضلع پولیس نے ایس او جی، سی آر پی ایف غی 126 بٹالین، جی آر پی، آر پی ایف، ایس ڈی آر ایف، وی ڈی جی، سول انتظامیہ، فائر ایمرجنسی تے میڈیکل ٹیمیں غے نال مل غے اک ماک ڈرل غو انعقاد کیو۔ یاہ مشق چناب پُل ور ہوئی، جہیڑو جموں کشمیر غا ضلع ریا سی مانہہ واقع جس نانہہ اُدھم پور سرینگر با رہمولہ ریل لینک پروجیکٹ غا حصہ غا طور ور بنایو گیو۔ یوہ متاثر کُن پُل دریائے چناب ور بے جس غی اونچائی دریا تیں اُپر 359 میٹر ہے۔ یوہ ایفل ٹاور تیں 35 میٹر اُچو ہے۔ اُونگاں ریلوے غی وزارت نے لمکا بُک آف ریکارڈ مانہہ بکھ بکھ جگہاں ور لوکاں غی متی توں متی عوامی خدمات غا پروگرام با رے شامل کیو گیو ہے۔ واضع رہ جے ریلوے وزارت نے 26 فروری 2024 نانہہ 2 ہزار 1 سو 40 جگہاں ور پروگرام منعقد کیا تھا جن مانہہ 40 لکھ 19 ہزار 5 سو 16 افراد نے شرکت کی تھی۔ یاہ تقریب سڑک غے اُپر تے سڑک غے تھلے ریلوے پُلان تے رلوے سٹیشنناں غو وزیر اعظم نریندر مو دی غی طرفوں نی پتھر رکھن غے دوران منعقد کی گئی تھی۔ اس ضمن مانہہ بھارتی ریلوے غی زبردست کوششاں نانہہ تسلیم کر غے اس غو ناں لمکا بُک آف ریکارڈ مانہہ درج کیو گیو ہے۔

DGP Security Meet

پولیس غا ڈائریکٹر جنرل نلین پرہات نے پچھلے تہاڑے ضلع پولیس لا ئین جموں مانہ افسراں نال تعارفی میٹنگ کی۔ جس مانہ سکیورٹی غی حکمت عملی نانہ مضبوط بنان تے دیگر قانون نا فذ کرن آلا اداراں غے نال تال میل ور توجہ مرکوز کی گئی تانجے خطہ مانہ امن برقرار رکھیو جا سکے۔ اُنہاں نے اُبھرتا واہ خطرات واسطے فعال اقدامات تے فوری ردِ عمل غی ضرورت ور روشنی کھلتاں واں موجو دہ سکیورٹی صورتحال ور توجہ دتی۔ ڈی جی پی نے ضلع جموں مانہ امن و امان نانہ برقرار رکھن، عوامی مفادات غا تحفظ نانہ یقینی بنان ور افسراں غی حوصلہ افزائی کی۔ اُنہاں نے عوامی اعتماد تے شفافیت غی اہمیت ور زور دتو۔ افسراں ور زور دتو گئو کہ وے لوکاں ور توجہ مرکوز کرن آلا طریقاں نانہ اپناویں۔ جموں زون پولیس غی تعریف کرتاں واں اُنہاں نے کہیو جے وے عزم غے نال جموں غا لوکاں غی خدمت جاری رکھیں۔

India Russia IGC

خارجہ امور بارے وزیر ڈاکٹر ایس جے شنکر نے اس گل ور اطمینان غو اظہا رکیو ہے جے بھارت تے روس بشکار 10 ارب ڈالر غی تجارت بارے بدف اپنی ممکنہ مدت 2030 توں پہلاں ہی پورو کر لئو جائے گو۔ اج نوی دہلی مانہ بھارت ایشیا بشکار تجارتی، اقتصادی، سائنسی تے ثقافتی تعاون بارے بین الحکومتی کمیشن غا 25 واں اجلاس سنگ خطاب مانہ جناب جے شنکر نے کہیو جے روس بھارت واسطے کھاد غا اک بڑا ذریعہ غے طور ور باندے آئو ہے۔ اُنہاں نے مزید کہیو جے روس غی طرفوں کچا تیل، کوئلہ تے یورنیم گی فراہمی خاصی اہم ہے۔ جناب جے شنکر نے کہیو جے بھارت غی دوائیاں آلی صنعت روس واسطے اک سستی تے قابلِ اعتماد ذریعہ ہے باندے آئو ہے۔ وزیر موصوف نے کہیو جے تجارتی کم کاج مانہ کجھ دقت آری ہیں جنہاں نانہ دور کرن غو کم جاری ہے تے کجھ اجاں باقی ہے۔ اُنہاں نے کہیو جے بھارت روس غی طرفوں مشترکہ کوشش جن مانہ شمال جنوبی ٹرانسپورٹ کا ریڈور، چنئی ولادیووستک کاربڈور تے شمالی سمندری رستہ رابطہ غی کوشش نانہ اگے بدھنو چاہیے۔ اُنہاں نے کہیو جے دوئے فریق اپنی خوراک، توانائی تے صحت غی سلامتی واسطے اہم تعاون بارے تبادلہ خیال کریں گا۔ اس دوران روس غا پہلا نا

ٹب وزیر اعظم ڈینس مانتروو نے کہیو جے پچھلا 5 بہراں مانہہ دوباں مُلکاں بشکا ر
تجا رتی کم کاج مانہہ 5 گنا توں متو اضافو بوؤ ہے۔ اُنہاں نے کہیو جے بھارت روس
غو خارجہ معاشی ساتھی غا طو ر ور دوجو بڑو مُلک ہے۔

Pravas Bahartiya Website

خارجہ امور با رے وزیر ڈاکٹر ایس جے شنکراج نوی دہلی مانہہ پرواسی بھارتیہ دیوس
2025 غی ویب سائٹ نانہہ شروع کریں گا۔ پرواسی بھارتیہ تہاڑو اگلا سال 8 توں
10 جنوری بشکا ر بھونیشور مانہہ مانیو جائے گو۔ یوہ تہاڑو 9 جنوری نانہہ مانیو جا
ئے کیونجے سال 1915 مانہہ 9 جنوری آلی تہاڑے مہا تمہ گا ندھی جنوبی افریقہ توں
بھارت واپس آیا تھا۔ یوہ تہاڑو بیرون مُلک مانہہ رہ ریا بھارتیہ لوکاں غی بھارت غی
ترقی مانہہ سانج غو وی ذکر کرے۔

Rajnath Defence

وزیر دفاع راجناتھ سنگھ نے اج بدلتا وا جنگی تے حفاظتی خطرات سنگ موثر طو ر ور
نمژن واسطے دفاعی حکمت عملی ور زور دتو۔ اج نوی دہلی مانہہ دفاعی
مذاکرات غی افتتاحی تقریب سنگ خطاب کرتاں واں اُنہاں نے کہیو جے دفاع اک
شراکت داری انتخاب نہیں بلکہ اک ضرورت ہے۔ جناب سنگھ نے کہیو جے مُلک غا
دفاعی ہدف نانہہ ایجادکا ری، جدت ور مبنی ہونو چاہیے تا نجے مستقبل مانہہ پیش
آن آلی دقتاں غو سامنو کیو جا سکے۔ اُنہاں نے مزید کہیو جے حکومت قومی
سلامتی غی خلاف معلوماتی جنگ غا خطرہ سنگ نمژن واسطے دفاعی حکمت
عملی اپنان واسطے پُر عزم ہے۔

یہ خبرتم آکاشوانی جموں تیں سُن رہیا ہیں خبراں غا باقی حصہ نال نصرت
چودھری۔

Rana Forest

وزیر برائے جنگلات تے ماحولیات جا وید رانا نے پچھلے تہاڑے جنگلات محکمہ
غاسینٹر افسراں ور زور پاتاں واں کہیو ہے جے مقامی لوکاں سنگ رل غے جنگلاتی
تے ماحولیاتی وسائل غا تحفظ واسطے شراکت دارانہ کردار ادا کریں۔ وزیر موصوف

نے جنگلات کا حقوق با رے قانون کا نفاذ، پہرتی کا عمل نانہ تیز کرن، لکڑی غی تسکری ور روک لان تے مقامی لوکان سنگ خصوصاً روایتی طور ور جنگل مانہ ربن آلا لوکان سنگ خوشگوار تعلقات قائم کرن غی ہدایت دتی۔ سول سیکریٹریٹ جموں مانہ محکمہ کا افسران تے اہلکاران سنگ اک مختصر تعارفی میٹنگ مانہ جناب جا وید رانا نے اُمید ظاہر کی ہے جے جنگلات تے ماحولیات غو تحفظ کرن آلی مقامی برادریاں سنگ رل غے تحفظاتی کم کریں گا۔ وزیر موصوف نے افسران ور عوامی مسائل کا حل واسطے لگن تے خلوس سنگ کم کرن تے جنگلات کا حقوق بارے قانون کا نفاذ تے جنگل مانہ ربن آلی قبائلی برادریاں کا قانونی حقوق غی ضرورت ور وی زور پایو۔

Pradhan Workshop

مرکزی وزیر تعلیم دھرمیندر پردھان نے اس گل ور زور کھلیو کہ 2047 توڑی بھارت ترقی یافتہ ملک بنن کا ہدف غی بنیاد تعلیم ہے۔ نوی دہلی مانہ اعلیٰ تے تکنیکی تعلیم ور قومی ورکشاپ تیں خطاب کرتاں واں اُنہاں نے اس شعبہ واسطے 5 توجہ مرکوز کرن آلا شعباں ور روشنی کھلی۔ جسراہ کہ بنیادی ڈھانچہ، قیادت، نصاب، کھشیر الجہتی شعبہ تحقیق تے متحرک کیمپس غی زندگی۔ اُنہاں نے ریاستاں تے مرکزی زیر انتظام علاقان کا نمائنداں غی حوصلہ افزائی کی تے کھیو جے قومی تعلیمی پالیسی این ای پی 2020 نانہ فعال طور ور نافذ کریں۔ این ای پی غے تحت روایتی طور ور ہم نصابی مضامین جسراہ کھیل، شاعری، ڈرامو، پیشہ وارانہ کورس مانہ تبدیل ہو رہیا ہیں۔ اُنہاں نے مادری زبان مانہ تعلیم غی اہمیت ور وی زور کھلیو تے اُنہاں نے ”نیشنل کریڈیٹ سسٹم“ تے ”انو سندھان نیشنل ریسرچ فاؤنڈیشن“ جیسا اقدامات نانہ اُجاگر کیو۔ تعلیم غی وزیر مملکت سکانتا مجمدار نے کھیو جے این ای پی 2020 محض اک پالیسی نہیں ہے بلکہ بھارت نانہ عالمی علمی طاقت بنان غو خاکو ہے۔

Direct Tax Collection

اس مالی سال مانہ ملک اندر براہ راست ٹیکس وصولی مانہ 15 عشاریہ 41 فیصد غو باہدو ہوؤ ہے۔ تے اس طرح یاہ رقم ہُن توڑی 12 لکھ 10 ہزار کروڑ روپیاں توں متی ہو گئی ہے۔ براہ راست ٹیکس کا مرکزی بورڈ غے مطابق سی بی ڈی ٹی اس سال

پہلی اپریل توں 10 نومبر غی مدت غے دوران مجموعی براہ راست ٹیکس غی وصولی 21 عشاریہ 2 فیصد بدھ غے 15 لکھ کروڑ روپیاں توں متی ہو گئی ہے۔ جد کہ اس دوران 2 لکھ 91 ہزار کروڑ روپیا واپس وی کیو گیو ہے۔ اس ضمن مانہ مزید دسیو گیو ہے جے کا رپو ریٹ ٹیکس مانہ وی خاصو بابدو دیکھیو گیو ہے جس مانہ پچھلا سال پہلی اپریل توں 10 نومبر تک 4 لکھ 79 کروڑ روپیا اکھٹا کیا گیا تھا جد کہ اس سال 5 لکھ 10 ہزار کروڑ روپیاں نانہ اکھٹو کیو گیو ہے۔

Goa Film Festival

بھارت غو 55 ووں بین القوامی فلم فیسٹول پنچی گواہ مانہ 20 تیں 28 نومبر 2024 توڑی منعقد کیو جائے گو۔ وزارت اطلاعات و نشریات نے این ایف ڈی سی تے انٹرٹین منٹ سو سائٹی آف انڈیا غا اشتراک نال اس غو اہتمام کیو ہے۔ جس غو اس سال غو موضوع ہے ”ینگ فلم میکر دا فیوچر ایز نا و“ فیسٹویل مانہ 81 ملکاں غی 180 تیں متی فلم دسی جائیں گی جن مانہ 15 ورلڈ پریمر شامل ہیں۔ بھارتی سنیما غا لیجنڈری شخصیات جسرح کہ راج کمار، فلم میکر تپن سنہا، تلیگو سٹار نا گیشور راؤ تے گلکار محمد رفیع نانہ اُن غی 100 ویں سالگراہ غا موقعہ و ر خصوصی خراج عقیدت پیش کیو جائے گو۔

اس غے نال ہی خبراں غو یوہ بلیٹن ختم ہوؤ۔